

ISTITUZIONS

N batiman al Procurador

*Tel Consei General di 13 de firé Detomas é stat
rengrazià per esser stat bon de comedèr na situazion
encompra per la proprietà del Navalge che jia inant
da passa 30 egn*



N moment del Consei General di 13 de firé.

Lé stat l'argoment de maor emportanza del Consei General chiamá ite dal president Cristoforo Debertol en lunesc ai 13 de firé, chel che à aproà la zescion debant de bens anter l Comun General e l Comun de Moena en cont del teater de Navalge.

L'ultim vèrehch de n percors che tel ultim an à permetù de meter fin a na situazion dassen encompra che se tirerà inant da passa 30 egn.

Lé stat l procurador Giuseppe Detomas a ge portèr dant en curt a duc i conseieres la storia de la proprietà de la gran strutura de Moena che jia inant dal 1987, canche l'era amò l Comprenjorie Ladín de Fascia. Jà da egn dant se rejònèa del besegn de fér su n teater a Moena – à dit l Procurador – e apontin a la fin di egn '80 l è vegnù fora l'ocajion de aer n finanziament provinzièl per fér su chesta strutura, che però cognëa esser soracomunala, doncà portèda inant dal C11. L Comprenjorie de Fascia à azetà de tor su dut l iter de frabica, dijan ampò fin dal scomenz che dapò la gestion aessa cognù vegnir portèda inant dal Comun de Moena. Ampò l è vegnù fora n problem per i terens: per la maor pèrt de la spersa de Navalge no l è stat fat l passaje de proprietà, che è restèda del Comun, l C11 à comprà demò 6 partizèles che mencéa e les era de privac. Dut chest à créà de gregn problemes canche l è stat ora de meter a catastèr l frabicat, de aer l'agibilità e ence de l arsegurér per meter a jir i evenç. Problemes che – à jontà ite Cristina Donei, vizeombolta de Moena stata ence pruma Procuradora del CGF – se à tirà inant per duc chisc egnenza che nesciugh sie bogn de troér na strèda per n vegnir fora.

Do 30 egn, l frabicat de Navalge aea gran besegn de intervenc, soraldut per miorament energetich, e per chest l Comun de Moena aea pervedù de durèr 500.000 euro del Fondo Strategich e l à domanà etres finziamenc sul bando per l PNRR:

scioldi che ampò l medemo Comun no podea durèr sun n frabicat de chel che no l era patron, e per l Comun General no l era possibol ge zeder debant n ben a n Comun.

Detomas te sia esperienza giuridica l à vardà coche pel fér la Provinzia a ge zeder bens ai Comuns zenza che la Cort di Conts aesse vélch da dir, l à vedù che chest è pervedù da na lege apostà e l à fat aproèr da la Finanziaria tel Consei provinzièl na norma medema ence per l Comun General.

A chesta vida, do l'aproazion data da dut l Consei General a una, ades l teater de Navalge pel vegnir metù a catastèr a inom del Comun de Moena, che l pel fér dapò duc i intervenc che l è de besegn.

Per chest Cristina Donei ge à palesà l detelpai bon fort del Comun de Moena al Procurador, e l'à domanà n batiman che duc i conseieres ge à fat, per chest e ence per l auter gran vèrehch che Detomas ge à fat fér al Comun General con l'aproazion de la Lege Alfreider che ge à permetù al CGF de vegnir considerà a duc i efec n ent local recognosciù a livel costituzionèl.

Tel medemo Consei l è stat ence aproà la cordanza/convenzion anter l CGF e i Comuns per meter en doura a na vida unitera la scommenزادies de stravardament e svilup del lengaz e de la cultura ladina: aldò de chest ence per i 5 egn che vegn i Comuns de Fascia ge utara al CGF l 50% del contribut che i ciapa sul Fondo perequati provinzièl per la mendranzes.

En ultima l è stat aproà l passaje de la senta de Secretèr del Comun General da 3^a a 2^a clas, n mudament pervedù de obligh aldò del numer de sentadins del CGF e che – à sotrißà l Procurador, permet ence de aer per l ent n post professionèl più atrativ e na figura de livel più aut con maor competenza.

Lucia Gross